

մասին» ՀՀ օրենքի 8-րդ հոդվածի 5-րդ մասի 10-րդ կետի և ՀՀ առողջապահական և աշխատանքի տեսչական մարմնի կանոնադրության (այսուհետ՝ Կանոնադրություն) 19-րդ կետի 11-րդ ենթակետի համաձայն Տեսչական մարմնի ղեկավարը ստուգում իրականացնելու վերաբերյալ տալիս է հրաման կամ հանձնարարագիր, ինչպես նաև ստուգումների արդյունքների հիման վրա կիրառում է պատասխանատվության միջոցներ՝ հիմք ընդունելով «Հայաստանի Հանրապետությունում ստուգումների կազմակերպման և անցկացման մասին» ՀՀ օրենքը:

«Հայաստանի Հանրապետությունում ստուգումների կազմակերպման և անցկացման մասին» ՀՀ օրենքի 3-րդ հոդվածի 1.1 մասի համաձայն բոլոր ստուգումները անցկացվում են բացառապես ստուգաթերթերի հիման վրա, որոնք հաստատում է ՀՀ կառավարությունը:

Տեսչական մարմինը ստուգում իրականացնում է ստուգման տարեկան ծրագրի հիման վրա, որը Կանոնադրության 15-րդ կետի 1-ին ենթակետի համաձայն տեսչական մարմնի ղեկավարի ներկայացմամբ հաստատում է Տեսչական մարմնի կառավարման խորհուրդը: Խորհուրդը հաստատում է նաև Տեսչական մարմնի գործունեության տարեկան ծրագիրը, գործունեության տարեկան ծրագրում ներառվում են տեսչական մարմնի կողմից իրականացվելիք իրազեկման, խորհրդատվական և բացատրական աշխատանքները:

Այսպիսով, հաշվի առնելով վերոգրյալը, հաշվեքննող խումբը հաշվեքննող ժամանակաշրջանում՝ 2017թ.-ի հունվարի 1-ից 2018թ.-ի սեպտեմբերի 30-ը, արձանագրել է հետևյալ խեղաթյուրումներն ու անհամապատասխանությունները՝

1. Տեսչական մարմնի կողմից 2017-2018թթ.. ստուգումներ չեն իրականացվել ստուգումների տարեկան ծրագրեր, ստուգումների մեթոդաբանություն և ստուգաթերթեր չունենալու պատճառով:
2. Տեսչական մարմինը ՀՀ կառավարության 27.04.2017 թ. N 444-Ն որոշման 3-րդ կետով սահմանված քառամսյա ժամկետում չի իրականացրել մարմնի ձևավորման համար անհրաժեշտ գործառույթները, այն է՝ չի մշակել տեսչական մարմնի գործունեության և իրականացվող ստուգումների տարեկան ծրագրերը, ռիսկերի վրա հիմնված մեթոդաբանություն, ստուգաթերթեր, իրավական ակտերում չեն կատարվել համապատասխան փոփոխություններ և այլն:
3. Տեսչական մարմինը չի ապահովել ՀՀ կառավարության 27.04.2017թ. N 444-Ն որոշման 8-րդ կետով սահմանված լուծարված պետական տեսչությունների կողմից սկսված և չավարտված վարչական, դատական և այլ գործառույթների իրականացման հետագա ընթացքը և չի իրականացրել ՀՀ առողջապահության նախարարության աշխատակազմի առողջապահական պետական տեսչության ստուգումների տարեկան ծրագրով նախատեսված թվով 950 տնտեսվարող սուբյեկտների մոտ ստուգումները:
4. Տեսչական մարմինը չի իրականացրել ՀՀ կառավարության 2015թ.-ի հուլիսի 30-ի N 839-Ա որոշման 1-ին կետի 6-րդ ենթակետով սահմանված այդ որոշման հավելվածով հաստատված ստուգումների տարեկան ծրագրում ընդգրկված և բարձր ռիսկային խմբում գտնվող սուբյեկտների մոտ ստուգումները՝ թիվ 26 (հանրակրթական դպրոցների) և 27 (նախադպրոցական կազմակերպությունների) ստուգաթերթերով:

Առաջարկություններ

Հաշվեքննության ընթացքում արձանագրված անհամապատասխանությունների կամ խեղաթյուրումների վերաբերյալ հաշվեքննության օբյեկտի ղեկավարությանը և այլ շահագրգիռ կողմերին ներկայացվում են հետևյալ առաջարկությունները՝

Տեսչական մարմնին՝

1. Օրենքով սահմանված ժամկետներում հաստատել Տեսչական մարմնի ստուգումների տարեկան ծրագրերը:
2. Սահմանված ժամկետներում մշակել և Կառավարության հաստատմանը ներկայացնել Տեսչական մարմնի ստուգաթերթերը:
3. Ստուգումներ իրականացնել հաստատված բոլոր ստուգաթերթերով, որպեսզի Տեսչական մարմնի Կանոնադրությամբ հաստատված վերահսկողության յուրաքանչյուր ոլորտ լինի մշտական հսկողության ներքո:
4. Օրենքով սահմանված ժամկետներում մշակել և համապատասխան մարմնի հաստատմանը ներկայացնել «ՀՀ առողջապահական և աշխատանքի տեսչական մարմնի կողմից իրականացվող ռիսկի վրա հիմնված ստուգումների» մեթոդաբանությունը և ռիսկայնությունը որոշող չափանիշները:
5. Օրենքով սահմանված ժամկետներում մշակել և համապատասխան մարմիններին ներկայացնել իր իրավասությանը վերաբերող իրավական ակտերի նախագծեր:

ՀՀ կառավարությանը՝

1. Սահմանված ժամկետներում հաստատել Տեսչական մարմնի ստուգաթերթերը, ռիսկի վրա հիմնված ստուգումների մեթոդաբանությունը և ռիսկայնությունը որոշող չափանիշները:

Հաշվեքննության օբյեկտների ղեկավարների պատրասխան

Տեսչական մարմնին՝

Տեսչական մարմնի կողմից այս կետի վերաբերյալ ներկայացված դիրքորոշումներն էական առումներով որևէ հիմնավոր պարզաբանումներ չեն պարունակել, կրել են հիմնականում բացատրական բնույթ և հաշվեքննության խմբի կողմից չեն ընդունվել:

ՀՀ առողջապահության նախարարություն՝

ՀՀ ԱՆ-ի կողմից այս կետի վերաբերյալ առարկություններ չեն ներկայացվել:

III. ՏԵՍՉԱԿԱՆ ՄԱՐՄՆԻ ԿՈՂՄԻՑ ԻՐԱԿԱՆԱՑՎԱԾ ՎԱՐՉԱԿԱՆ ՎԱՐՈՒՅԹՆԵՐԸ

**Տեսչական մարմնի կողմից
2017թ.-ին վարչական
վարույթներ չեն հարուցվել**

«Վարչարարության հիմունքների և վարչական վարույթի մասին» ՀՀ օրենքի 30-րդ հոդվածի 1-ին և 2-րդ մասերի համաձայն վարչական վարույթ հարուցելու հիմքերն են՝

ա) անձի դիմումը, բողոքը.

բ) վարչական մարմնի նախաձեռնությունը:

Վարչական վարույթը համարվում է հարուցված՝ համապատասխան դիմումը կամ բողոքը վարչական մարմնում ստանալու օրվանից, բացառությամբ այն դեպքերի, երբ դիմումը կամ բողոքը վերահասցեագրվել է ըստ իրավասու վարչական մարմինների կամ վերադարձվել է դիմողին (բողոք բերողին): 2018թ. սեպտեմբերի 20-ի դրությամբ իրականացվել են դիմում-բողոքի հիման վրա՝ 76, սեփական նախաձեռնությամբ՝ 83 վարչական վարույթներ:

Այսպիսով, հաշվի առնելով վերոգրյալը, հաշվեքննող խումբը հաշվեքննող ժամանակաշրջանում՝ 2017թ.-ի հունվարի 1-ից 2018թ.-ի սեպտեմբերի 30-ը, արձանագրել է հետևյալ խեղաթյուրումներն ու անհամապատասխանությունները՝

1. Տեսչական մարմնի կողմից 2017թ. -ին վարչական վարույթներ չի հարուցվել:

Առաջարկություններ

Հաշվեքննության ընթացքում արձանագրված անհամապատասխանությունների կամ խեղաթյուրումների վերաբերյալ հաշվեքննության օբյեկտի ղեկավարությանը և այլ շահագրգիռ կողմերին ներկայացվում են հետևյալ առաջարկությունները՝

Տեսչական մարմնին՝

1. Հետամուտ լինել դիմում-բողոքների կամ սեփական նախաձեռնությամբ վարչական վարույթների պատշաճ իրականացմանը:

Հաշվեքննության օբյեկտների ղեկավարների պատասխան

Տեսչական մարմին՝

Տեսչական մարմնի կողմից այս կետի վերաբերյալ ներկայացված դիրքորոշումներն էական առումներով որևէ հիմնավոր պարզաբանումներ չեն պարունակել, կրել են հիմնականում բացատրական բնույթ և հաշվեքննության խմբի կողմից չեն ընդունվել:

ՀՀ առողջապահության նախարարություն՝

ՀՀ ԱՆ-ի կողմից այս կետի վերաբերյալ առարկություններ չեն ներկայացվել: